

EDITORIAL

Lalum nga krisis ug subsub nga mga pakigbisog niining lumalabayng tuig

Labaw nga migrabe niining lumalabayng tuig 2025 ang krisis sa ekonomiya ug pulitika sa nagharing sistema, labawng migrabe ang interbensyong militar sa imperyalismong US ug misamot ang katilingbanong kahimtang sa mayorya sa katawhan. Dungan niini, mikusog ang mga pakigbisog batok sa korapsyon ug pasismo sa rehimeng US-Marcos.

Nahimong tataw ang bangi sa mga nagharing hut-ong, partikular ang lantugiyay sa magkaaway nga paksyong Marcos ug Duterte. Gipa-saka sa kongreso niadtong Pebrero ang kasong impeachment batok kang Sara Duterte, apan nahunong ang kaso dihang gipugngan mismo ni Ferdinand Marcos Jr ang pagdunog sa Senado. Niadtong Marso, nakigtinabangay si Marcos sa Interpol sa pag-aresto ug pagpriso sa The Netherlands sa kanhing presidenteng si Rodrigo Duterte pinaagi sa mandamyento sa International Criminal Court. Didto siya taralun sa mga krimen batok sa katawhan tungod sa dinaghang pagpatay sa "war on drugs."

Nahitabo niadtong Mayo ang eleksyon sa senado, kongreso ug lokal nga gubyrno. Tataw ang pagpanglimbong ug manipulasyon sa resulta. Nagsalamin kini sa panagbangi ug akomodasyon sa lain-laing paksyon sa nagharing hut-ong, ug interbensyon sa im-

peryalismong US. Samtang nagpabiling hingpit ang suporta sa US kang Marcos, gipwesto na usab niini ang iyang mga reserbang kabayo sa pagdagan sa eleksyong 2028.

Walay susama ang interbensyong militar sa US sa tibuok tuig. Sa pakigkunsaba sa rehimeng Marcos ug gamit ang Armed Forces

of the Philippines (AFP), giablihan ang bag-ong mga base ug pasilidad militar. Naghan-ok ang US og dugang nga mga armas sa Pilipinas. Walay hunong nga ginapahigayon ang mahagitong mga ehersisyong militar sulod ug palibot sa South China Sea, sa kaalautan sa mga mangingisdang Pilipino.

Labaw nga mikusog ang lantugiyay sa mga nagharing hut-ong human mabutyag ang dakung kaso sa korapsyon kalabot sa puno sa kahiwian nga mga flood control project ug kontrata sa mga proyektong pang-imprastruktura. Miulbo

ang kasuko sa katawhan sa daku kaayong kwarta nga ginabulsa ni Marcos ug sa mga korap nga upisyal sa gubyrno.

Misulbong sa tibuok nasud ang lapad nga kalihukang protesta batok sa korapsyon ug burukrata-kapitalismo. Sulod sa duha ka bulan sukad Setyembre, nagpadayon ang mga walkout ug rali sa mga estudyante sa lain-laing kampus. Natukod ang

lapad nga alyansa sa mga pwersang anti-korapsyon sa lain-laing sektor ug lugar, bisan og adunay pipila ka pwersa nga tinuyong ginasi-mang ang kasuko sa katawhan kang Marcos.

Taliwala sa pagsulay nga tabunan ang papel sa Malacañang sa mga anomalya pinaagi sa



gipasundayag nga "imbestigasyon," gibutyag sa mga nalambigit sa korapsyon nga mismong si Marcos ang utok ug nagadawat og daku kaayong kikkak sa gatusan ka bilyong pisong mga proyektong pang-imprastruktura. Sa wala madugay, milanog ang singgit para sa pagpaluwat o pagpalagpot kang Marcos ug Duterte.

Ang protesta batok sa korapsyon miulbo taliwala sa padayon nga paglalum sa krisis sa ekonomiya, pagkahagba sa kahimtang sa lapad nga masa sa katawhan, ug walag too nga mga programa ug lakang sa rehimeng Marcos nga paantus sa katawhan.

Lapad ang disgusto sa katawhan atubangan sa ubos nga suhulan sa mga mamumuo, kawalay trabaho, halos sinimana nga pagsaka sa presyo sa lana, mahal nga singil sa palpak nga mga serbisyo sa tubig, kuryente ug transportasyon, *jeepney phaseout*, pribatisasyon sa mga merkado, magun-ubon sa kinaiyahan ug panginabuhian nga reklamasyon, pagpangilog og yuta, pagpalayas sa mga mag-uuma ug uban pang pagpaantus. Mini ang ginainngong kalinaw taliwala sa grabeng pagpanumpo ug pagpaantus sa katawhan.

Malukpanon ang panawagan alang sa ₱1,200 inadlawng minimum na suhulan. Nahimong tataw ang pipila ka welga sa mga mamumuo ug protesta sa lain-laing sektor sa lain-laing lugar aron ipakigbisog ang ilang kaayuhan. Nagkalapad ug nagkadaghan ang mibarog batok sa pasistang pagpanumpo sa rehimeng Marcos. Daghan ang napukaw sa pagpresentar sa mga progresibong partido sa nasudnon-demokratikong programa sa pagsalmot sa eleksyon. Ang determenasyon sa pag-organisa ug pagpalihok sa masa sigurdong motigum ug mobwelo sa umalabot nga mga panahon.

Atubangan sa lalum nga krisis ug subsub nga pakigbisog, ug bunga sa kalihukang pagtul-id, padayon nga nakapakusog ang Partido ug mga rebolusyonaryong pwersa. Padayon nga gipataas ang ang-ang sa teorya ug praktika pinaagi sa kalihukang pagtuon. Gipakaylap sa Partido ang pagtuon sa burukrata-kapitalismo isip giya sa pagsabot sa katawhan sa isyu sa korapsyon.

Gipakusog ang mga tago nga rebolusyonaryong organisasyong masa sa mga mamumuo, mag-uuma, kabatan-onan, magtutudlo, artista, siyentista, mga duktor, nars ug ma-

mumuong pangkalusugan, tawong-simbahan, mga migranteng Pilipino, ug iba pang mga sektor sa kasyudaran. Samtang nagpropaganda alang sa demokratikong rebolusyon sa katawhan, nagkadaghan ang nagdesisyon nga mosalmot sa armadong pakigbisog ug rebolusyonaryong kalihukang mag-uuma sa kabanikanhan.

Sa kabanikanhan, padayon nga nagaabante ang mga pakigbisog sa mag-uuma sa pagpanalipud sa ilang yuta ug panginabuhian batok sa mga mangingilog, batok sa paantus nga mga palisiya sa rehimeng Marcos ug pasistang pagpanumpo sa mga armadong gaway niini. Nahitabo ang mga barikada ug laing porma sa protesta sa pipila ka lugar. Ginapakusog ang mga sanga ug komite sa Partido, ginatukod ang mga rebolusyonaryong organisasyong masa sa mga mag-uuma, kabatan-onan ug kababayan-an, ang ilang mga yunit milisya ug yunit depensa-sa-kaugalingon, samtang nanglimbasog ang mga yunit sa Bagong Hukbong Bayan sa gimbuhatong masa ug gerilyang pakiggubat.

Sa pagpangulo ug pag-abag sa Partido, padayon ang BHB sa pagpalapad ug pagpalalum sa baseng masang mag-uuma. Sa naangkon niining lapad nga suporta, mayorya sa mga yunit sa BHB nakapreserba og kusog sa pag-atubang sa walay puas nga mga operasyong kombatan sa AFP. Nagkadaghan ang mga kadaugan sa aktibong pagdepensa, taktikal nga opensiba ug pagsilot sa mga lunod-patay nga traydor ug pasista. Padayon ang pagrekrut ug pagbansay sa mga bag-ong Pulang manggugubat ug kumander.

Atubangan sa malahutayong krisis sa nagharing sistema, ug sa pundasyon ng kalihukang pagtul-id, nakalantaw ang Partido sa dugang pagpakusog ug pag-abante sa demokratikong rebolusyon sa katawhan sa umalabot nga mga tuig. Determinado ang Partido nga pangulohan ang lapad nga masa sa pag-asdang sa malungtarong gubat sa katawhan ug pagkab-ot og mga kadaugan sa tibuok nasud.

 Bol. LVI Ihap 24 Disyembre 21, 2025	
Ang Ang Bayan ginapagawas sa pinulongang Pilipino, Bisaya, Iloco, Hiligaynon, Waray ug Ingles. Nagadawat ang Ang Bayan og mga kontribusyon sa porma sa mga artikulo ug balita. Ginaawhag usab ang mga tigbasa nga magpadangat og mga puna ug rekomendasyon sa pagpalambo sa atong mantalaan.	
Ang Ang Bayan ginamantala duha ka hugna matag bulan sa Komite Sentral sa Partido Komunista ng Pilipinas	
 ang.bayan@cpp.ph	

Unod

Editorial: Lalum nga krisis ug subsub nga mga pakigbisog niining lumalabayng tuig	1
Mga aksyon sa BHB sa Negros ug Samar	3
Hunong-buto sa Pasko ug Bag-ong Tuig sa PKP	3
Padayon nga konsolidasyon sa Negros	4
Pakigbisog sa mga mamumuo	4
Hagit sa CNL alang sa hustisya	5
Kunsabuhayng burgesya-kumprador ug burukrata	6
Sa mubong pagkasulti	7
Pakigbisog alang sa tawhanong katungod	8
3-tuig nga pagkamatay ni Ka Joma, gidumdum	9
MSP-NCR, naglunsad og asembliya	9
Mga mag-uuma ug lumad, ginapalayas	9
Adlaw sa mga migranteng mamumuo	10
Brutalidad sa militar ug pulis	10
Aregluhan sa pondong "pork" sa badyet 2026	10
Kadaut ug kaguliyang sa imperyalistang gubat	11
Dili mabuntog ang rebolusyon sa India	12

Mga aksyon sa BHB sa Negros ug Samar

Lima ka armadong aksyon ang gilunsad sa mga yunit sa Bagong Hukbong Bayan (BHB) sa isla sa Negros ug Samar sa milabayng mga semana. Lakip dinhi ang pagtarget sa mga aset paniktik sa militar ug nag-operasyong mga pulis.

Sa Negros Occidental, napatay si Police Senior Master Sergeant Rommel Aguilar dihang nakipinulay ang mga pulis sa usa ka tim sa BHB-Northern Negros (Roselyn Jean Pelle Command). Nakumpiska kaniya ang usa ka 9mm pistola ug mga bala. Nasugatan sa BHB ang grupo sa mga pulis sa Purok 5, Barangay Lagaan sa Calatrava niadtong Disyembre 7. Paatras niadtong tungura ang mga Pulang manggugubat gikan sa aksyong militar batok kang Mando Ugdiman, usa ka aset paniktik sa militar, sa Sityo Tagda, Barangay Dolis. Nasakmit kang Ugdiman ang usa ka .45 pistola, mga bala ug uban pang himang iggugubat.

Niadtong Disyembre 13, patay ang aset paniktik nga si Amay Jimenez sa Sityo Makilo, Barangay Camansi, Kabankalan City sa operasyon sa BHB-Southwest Negros (Ar-

mando Sumayang Jr Command). Nalambigit si Jimenez sa pagtudlo sa lokasyon ug pagplano sa pagpatay niadtong Nobyembre 2022 sa ig-suon niyang lider mag-uuma nga si Joseph Jimenez ug konsultant pangkalinaw sa National Democratic Front of the Philippines nga si Ericson Acosta. Usa pa ka aset paniktik ang gisilutan sa Sipalay City niadtong Disyembre 4.

Makahibulong nga depensa

Sa Samar, duha ka sundalo sa Intelligence Service of the AFP (ISAFP) ug Military Intelligence Battalion (MIB) ilalum sa 8th ID ang napatay sa armadong engkwentro sa BHB-Western Samar (Arnulfo Ortiz Command) sa Barangay Babaclayon, San Jose de Buan. Nahitabo ang panagsangka niadtong Disyembre 3 sa ala-1:32 sa kaadlawon.

Matud sa taho sa BHB, duha ka manggugubat niini ang anaa sa komunidad aron konsultahon ang masang gigun-ob sa militarisasyon sa mga sundalo. Dili moubos sa 20 ka tropang militar ang tulo-ka-adlaw nang nag-operasyon sa maong komunidad niadtong adlaw.

Giliyukan sa mga operatibang paniktik sa militar ang balay nga ilang gisak-an ug pugos silang ginapasurender. Apan gisiguro sa mga Pulang manggugubat ang kaluwasan sa mga sibilyan, ug luwas nga gipagawas sa balay ang tibuok pamilya. Gipabuthan sa usa ka Pulang manggugubat ang mga sundalo nga mipugwat kanila. Sa atubangan mismo sa mga kaaway mihapa ang Pulang manggugubat samtang nagpabuto sa iyang dalang pistola. Duha ka pasistang tropa ang napatay sa dinul-itay nga panagsangka. Aron makalayo, miambak ang duha ka Pulang manggugubat pagawas sa balay samtang gipabuthan sa kaaway. Nasamdan ang usa sa mga manggugubat.

AB

Hunong-buto sa Pasko ug Bag-ong Tuig, gideklara sa PKP

Nagdeklara og upat ka adlaw nga hunong-buto ang Partido Komunista ng Pilipinas (PKP) isip pakighiusa sa mga tradisyunal nga pagsaulog sa masang Pilipino. Gimandoan sa Komite Sentral sa Partido ang Bagong Hukbong Bayan (BHB) nga ipatuman kini gikan 00:00 sa buntag sa Disyembre 25 hangtud 23:59 sa gabii sa Disyembre 26 ug gikan 00:00 sa buntag sa Disyembre 31, 2025 hangtud 23:59 sa gabii sa Enero 1, 2026.

Matud sa liderato sa Partido, paghatag-dalan ang hunong-buto sa mga simpleng pagsaulog sa mga Pilipino atubangan sa grabeng katilingbanon ug ekonomikanhong kahimtang ilalum sa rehimeng Marcos. Hipayon usab kini sa rebolusyonaryong kalihukan, duyog ang katawhan, aron saulugon ang ika-57 nga anibersaryo sa Partido sa Disyembre 26.

Sa pagpatuman sa hunong-buto, gimandoan sa Komite Sentral ang mga yunit sa BHB nga mag-aktibong depensa ilabina atubangan sa kadaut sa walay puas nga mga opera-

syong kombat sa Armed Forces of the Philippines (AFP). Kinahanglang hugot nga makigtinabangay ang mga yunit ng BHB sa masa aron mapatuman kini. "Kinahanglan usab nga kanunay silang andam nga magmaniobra o maglunsad og kontra-atake sa panahong gikinahanglan sa kahimtang," matud sa Komite Sentral.

Diha-dihang gikontra sa AFP ug Department of National Defense ang unilateral nga hunong-buto sa Partido ug hukbong bayan. Matud sa Partido, ang maong pamahayag

sa mga ginsakpan sa rehimeng Marcos nagpamatuud sa uhaw-sadugong kinaiya sa iyang armadong pwersa ug planong tugawon ang malinawong mga pagsaulog sa masang Pilipino.

"Walay laing gustong iregalo si Marcos sa katawhan sa umalabot nga mga tradisyunal nga pagsaulog kundili bala ug bomba sa pagmando niini sa AFP ug mga pulis nga maglunsad og walay puas nga mga operasyong kombat sa kabanikanhan," matud ni Marco Valbuena, nangulong upisyal sa impormasyon sa Partido.

Samtang, gimakmak sa Partido ang gipakaylap sa Philippine Army nga paglapas sa BHB sa hunong-buto sa panagsangka nga nahitabo sa Northern Samar niadtong Disyembre 15, bisan og di pa kini langkub sa deklarasyon.

AB

Kalihukang Pagtul-id: Makanunayong konsolidasyon sa Partido ug BHB sa Negros

Taliwala sa subsub nga operasyong militar, milahutay ang rebolusyonaryong kalihukan sa Negros sa pagpaasdang sa kalihukang pagtul-id. Makanunayon kining naningkamot nga konsolidahon ang Bagong Hukbong Bayan (BHB) ug ang Partido. Naglunsad kini og kolektibong mga pagtuon sa inang-ang nga kurso sa Partido ug mga pagbansay-militar.

Ning bag-o lang, napahigayon sa isla ang intermedyang kurso sa Partido sa “staggered” nga pamaagi. Gitambungan kini sa mga kadre ug upisyal militar. Luwas nga natapos ang tibuok kurso na tumagal ng kinatibuk-ang 54 oras (walo ka oras kada sesyon sa kada adlaw). Unod sa pagtuon ang dugang nga mga prinsipyong giya sa pagpalambo sa gimbuhatong masa ug pagpatuman sa mga rebolusyonaryong gimbuhaton sa gambalay sa kalihukang pagtul-id.

Malampuson usab ang pagtapos sa mga kadre ug upisyal sa BHB sa pagtuon ug pagbansay sa gipamubong kurso sa gimbuhatong paniktik. Milungtad kini og tulo ug tunga ka adlaw lakip na ang praktikum. Ang resulta sa praktikum nahiusahan sa kumand nga himuong upisyal nga plano sa mga pagalunsarong taktikal nga opensiba sa BHB.

“Dugang kahibalo ang maong teoretikal nga pagtuon ug pagbansay sa malampusong gimbuhatong militar ilabina ang paglunsad og taktikal nga opensiba,” matud kang Ka Marco, lider sa platon.

“Angayang mahatagan og hustisya ang mga biktimgang mga kauban ug masa sa grabeng pasismo sa kaaway...kinahanglang makasakmit og bala ug armas gikan sa berdugo ug pasistang AFP, PNP ug paramilitar ug ipaarmas sa mga bag-ong rekrut nga Pulang manggugubat,” matud niya.

“Hinog kaayo karon ang kahimtang sa pulitika. Kinahanglang tumanon sa Partido ang iyang papel sa pagpangulo ug himuon sa Hukbo ang sentral nga tahas niini pinaagi sa malampuson nga taktikal nga opensiba dungan sa grabeng kasilag sa katawhang Pilipino sa pagpangawat sa estado sa bahandi sa katawhan,” asoy ni Ka Myra, instruktur sa pulitika.

“Kinahanglang kusog nga bagtingon ang kampana sa rebolusyonaryong kalihukan sa malukpanong opensiba ug naglanog nga buto sa mga armas sa Bagong Hukbong Bayan sa kabani-kanhan dungan sa malukpanong

protesta sa masa sa mga kalsada sa kalunsuran,” matud niya.

AB



CBA sa Wyeth-Nestle ug unyon. Pormal nga napinal sa Wyeth Philippines Progressive Workers Union ang CBA niini sa Wyeth-Nestle Philippines niadtong Disyembre 9. Malampusong naduso sa unyon ang dugang-suhulan nga ₱6,000 sa mosunod nga tulo ka tuig. Nakab-ot usab sa unyon ang ₱30,000 *signing bonus* ug mga benepisyong ilang giduso pinaagi hiniusang paglihok.

Protesta sa mga mamumuo sa Gardenia ug Philfoods. Nagprotesta ang mga mamumuo ug unyon sa Gardenia Bakeries Phils Inc ug Philfoods Fresh Baked Products Inc sa pabrika ug sa gawas sa Laguna International Industrial Park (LIIP) sa Biñan, Laguna niadtong Disyembre 19. Nanawagan sila sa dugang-suhulan, benepisyo, ug paghunong sa pag-atake sa mga myembro sa unyon.

Mga marinong gideport sa US, gisingil ang DFA ug mga *manning agency*. Human makasinati og arbitraryong deportasyon sa US, giduso sa mga marinong Pilipino ang ilang katungod, ug gisingil ang DFA ug mga *manning agency*. Sa dayalogo niadtong Disyembre 12, nagsaad ang upisyal sa DFA nga paspasan ang pagproseso sa bag-ong pasaporte sa apektadong mga marino, ayuda aron moapela sa pagkansela sa visa ug tangtangan ang singil dinhi.

Pagtahod sa mga katungod sa pamuo, giduso sa Wipro Cebu. Nagpahigayon og *silent protest* ang mga empleyado sa Wipro Philippines sa Cebu dungan sa pakigdayalogo sa ilang mga representante sa kumpanya ug DOLE niadtong Disyembre 1. Gireklamo sa mga empleyado ang patung-patong nga mga paglapas sa kumpanya sa ilang katungod sa pamuo. Nag-unang reklamo nila ang dili makatarunganong plano sa Wipro Cebu nga gipailalum ang 400 ka empleyado sa “floating status” gikan niadtong Disyembre 15.

Mga Pilipinong mamumuo sa Taiwan, mibotar pabor sa welga. Mibotar niadtong Disyembre 1 pabor sa welga ang kababayan-ang mamumuong Pilipino sa Taidoc Technology Co. Ltd. batok sa paglapas sa kumpanya sa mga balaod sa pamuo. Lakip dinhi ang pugos nga pagpalimpyo sa pabrika, hugot nga palisiya sa dormitoryo, ug dili makatarunganong mga balayrunon. Kini ang kinaunhang welga sa unyon.

Pagpanday sa katilingbanong konsensya ug panaghiusa alang sa hustisya ug kamatuuran

Matataw niining mga milabayng bulan ang malukpanong partisipasyon ug pagsalmot sa mga tawong-simbahan, lider-relihiyoso ug layko sa mga demonstrasyon batok sa grabeng korapsyon sa rehimeng Marcos. Bisan og nagpabiling konserbatibo ang Simbahan, ang tingog ug pagparog niini ang usa sa nakaaghat sa liboang misalmot sa protesta sa katawhan kontra-korapsyon.

Sa tunga niini ang rebolusyonaryong pakiglambigit sa mga myembro sa Christians for National Liberation (CNL) nga maoy ubod sa pakigbisog sa katawhang Kristyano. Lakip kini sa mga gipaambit nilang Ka Lila ug Ka Mingol, mga bag-ong napili nga upisyal sa CNL, sa pakig-hinabi sa Ang Bayan.

Daku ang impluwensya sa Simbahan ug uban pang relihiyosong grupo sa usa ka nasud sama sa Pilipinas nga mayorya mga Katoliko, pagpaambit ni Ka Mingol.

“Ginaila silang tigsangyaw sa hustisya ug kamatuuran,” matud niya. Makaengganyo sa mga pamilya ug komunidad ang pagsalmot sa simbahan ug relihiyoso sa mga lihok protesta tungod kay sumbanan sila sa *moral legitimacy* o pagkahusto, sa mata sa kadaghanan.

Matud usab ni Ka Lila, ginatudlo sa mga tawong-simbahan ug debuto ang pakigsimpatiya sa katawhan, ang pagkamatinud-anon sa pagtabang sa matag usa, molihok para sa kamatuuran ug kaligdong ilabina atubangan sa grabeng kalisud ug katalagman. “Dili makatarunganon ang sistematikong pagpangawat sa rekursong angay igahin sa mga labing nanginahanglan,” matud niya.

Apan niadtong Nobyembre 30, mitataw ang managlahing barog sa Simbahan sa panawagan sa katawhan. Nakita kini sa nahimong lihok sa Iglesia ni Cristo ug mga lider sa Catholic Bishop’s Conference of the Philippines. Niining mga higayuna, nanawagan ang CNL nga walay kompromisong mobarog ug molihok subay sa hustisya, kama-

tuuran, ug kaligdong, ug molingkas sa bangi sa mga nagharang-hut-ong ug mga pamilyang nakapahimulos sa burukrata-kapitalismo.

“Ang isyu sa korapsyon sa *flood control projects* usa ka gamayng bahin lamang sa malukpanon ug sistematikong korapsyon sa reaksyunaryong gubyrno,” matud ni Ka Lila. Dili lamang kini mahitungod sa bangi sa pipila kundili mahitungod sa burukrata-kapitalismo o pagpahimulos nga gakahitabo sa pagpagan sa gubyrno isip negosyo, ang paghakop sa bahandi sa mga anaa sa gahum.”

“Ginapapha sa CNL ang naratiibo nga sa duha ka nanagbanging kampo lamang angayng matunga ang pagdapig, tungod parehong angayng manubag silang Marcos Jr ug Sara Duterte duyog sa uban pang mga nalambigit,” matud ni Ka Mingol.

Bisan lahi-lahi ang ginasulti sa mga lider-simbahan kalabot sa korapsyon, matud ni Ka Lila, tinaw sa CNL ang malukpanong kasuko dinhi sa masang relihiyoso.

“Hagit sa mga lider sa simbahan nga mahimong sumbanan sa pagkamapahiubsanon ug dayalogo,” du-

gang ni Ka Mingol. Nanawagan usab siya sa mga nahaubos nga lider—mga obispo, pari, pastor, ministro, ug mga lokal nga lider—nga dili lang magsunudsunod sa upisyal nga linya, ilabina kung lapas kini sa mga nasabtan nila mahitungod sa hustisya. “Tigprotekta sila sa panon, dili tigpanalipud sa gahum o kahilum atubangan sa dautan. Kinahanglan nilang umulon ang konsyensya sa kaligdong aron makiglambigit nga adunat baruganan di lang isip myembro sa bloke kundili isip mga responsableng indibidwal sa katilingban.”

Sama sa nangagi, daku kaayo ang papel sa Simbahan sa pagorganisa ug pagpukaw sa katawhan alang sa hustisya ug katilingbanong kausaban, matud ni Ka Mingol. Mahinungdanon nga walay-hunong nga pakusgon ang han-ay alang sa demokratikong rebolusyon sa katawhan. Matud niya, determinado ang CNL nga mapatigbabawan ug malabngan ang grabeng hagit sa konserbatismo, self-preservation ug Red-tagging aron kab-oton ang bag-ong kalagsik sa pagpalapad sa han-ay sa mga rebolusyonaryo sa mga tawong relihiyoso.

Gipasabot sa CNL nga aron mabatukan ang burukrata-kapitalismo, kinahanglan og rebolusyonaryong paglihok. Usa kini sa nakapapukaw ug nakapahugpong, ilabina sa lapad nga han-ay sa relihiyosong kabatan-onan. Makita kanila kadasig sa pagsalmot sa mga lihok-protesta hangtud sa armadong pakigbisog sa kabanikanhan. Ginakampanya sa CNL sa mga tawong-simbahan ang rebolusyonaryong programa sa National Democratic Front: ginapakita nga adunay alternatibong sistema sa panggamhanan nga nagaa-lagad sa demokratikong interes sa masa.



Kunsabuhay sa burgesyang kumprador ug burukrata-kapitalista sa sistemikong korapsyon

Niining miaging mga bulan, nabutyag ang sistemikong korapsyon ug hinakog nga pagpangawat sa pondo sa katawhan sa mga anaa sa gahum. Gikan sa puno sa anomalyang proyektong imprastruktura ug *pork barrel*, "unprogrammed appropriation" ug "allocables" sa nasudnong budget, nahimong tin-aw ang papel sa burukrata-kapitalismo sa nasinating walay puas nga pag-antus ug kapit-os sa katawhan.

Ilalum sa nagatunhay nga sistema, ginagamit sa mga burukrata kapitalista dili lamang ang ilang pusisyon aron mangawkaw og bahandi, nagahimo usab sila og mga balaod ug nagapatuman og mga palisiya nga nagsilbi sa ginapaboran nilang dagkung burgesya-kumprador ug langyawng kapitalista. Sa maong proseso, labaw silang nakahakop og bahandi.

Sulod sa kapin tulo ka tuig sa rehimeng US-Marcos, nag-amyenda ug nagpatuman kini sa dili moubos sa 15 ka balaod para sa kaharuhay ug benepisyo sa mga burgesya-kumprador ug langyawng kapitalista. Lakip dinhi ang mga balaod sa pagkibhang sa buhis sa mga korporasyon, pagtugot sa mga kumpanya nga 100% nga panag-iyahan ang mga esensyal nga industriya sa nasud sama sa telekomunikasyon, *airport*, ug *renewable energy*. Dugang dinhi ang pagtugot sa pag-angkon ug paggamit sa mga yuta sa Pilipinas og hangtud 99 ka tuig. Gipaspasan ug gidalian usab sa rehimen ang pagproseso sa aplikasyon sa mga langyawng negosyante sa nasud.

Lakip silang Manny Villar, Enrique Razon ug Ramon Ang sa mga burgesya-kumprador nga labawng naadunahan ilalum sa rehimeng US-Marcos. Kining tulo usab ang nagpaluyo sa pinakadakung partido pulitikal sa nasud. Gunit ni Razon ang National Unity Party, si Villar ang Nacionalista Party ug si Ramon Ang ang Nationalist People's Coalition. Kontrolado nila ang 42%

sa mga senador, 27% sa mga kongresista ug 33% sa mga gobernador.

Pribatisasyon isip kabahin sa sistemikong korapsyon

Lakip sa tinubdan sa bahandi sa dagkung burgesya-kumprador ang pribatisasyon sa mga serbisyo, imprastruktura ug negosyong pangpubliko. Usa sa pamaagi aron makakuha og proyekto mao ang *unsolicited proposal* (UPS) sa Public-Private Partnership Code of the Philippines (2023). Ilalum niini, mas gipakusog ang gahum sa pribadong sektor nga pilion ug dumalahan ang mga proyektong gusto niining kontrolon.

Ilalum sa PPP, nagahatag ang gubyrno og "garantiya" gikan sa pondo sa katawhan aron masiguro nga madayon ang proyekto. Ang gubyrno usab ang mosalo sa higayong malugi ang proyekto.

Ang San Miguel Corporation (SMC) ni Ramon Ang, ang usa sa nakapahimulos pag-ayo sa PPP. Nakuha sa SMC ang pipila sa dagkung proyekto niini pinaagi sa UPS. Lakip dinhi ang New Manila International Airport (NMIA), MRT 7, Cavite-Ba-

tangas Expressway, ug Pangasinan Link Expressway. Tungod sa kunsabuhay ni Ang ug sa rehimeng Marcos, paspas nga nasakmit sa SMC ang kontrata sa pag-opereyt ug pagdumala sa nag-unang *airport* sa nasud ug sa higanteng proyekto nga Navotas Bay Reclamation Project. Lakip sa proyekto ang pagtukod sa *business district* ug *expressway* padulong sa NMIA. Nakakuha usab ang kumpanya og napulo ka tuig nga *tax holiday* alang sa konstruksyon sa NMIA.

Taliwala sa pagkaguba sa kinaiyahan ug panginabuhian sa katawhan tungod sa mga proyektong imprastruktura sa SMC, wala kining tulubagon sa mga paglapas sa balaod ug tawhanong katungod. Samtang nangawkaw sa bahandi gamit ang pondo sa katawhan, naangkon niini ang proteksyon sa mga burukrata-kapitalista, nga nakapahimulos usab sa mga negosyo niini. Gawasnon usab nga nagamit sa SMC ang pulis, militar, lehislatura ug mga korte aron protektahan ang interes niini. Gipatataw sa maong kunsabuhay ang grabeng korapsyon sa sistemang burukrata-kapitalismo.

Ilalum sa pribatisasyon, ang langyawng kapitalista ug lokal nga burgesya-kumprador ang nagadikta sa kung unsang bahin sa ekonomiya ang pagabubuan og pondo, unsaon ug alang kay kinsa ang paglambo. Sa padayong pagtukmod sa rehimeng US-Marcos sa pagpribado sa nahabiling mga pangpublikong serbisyo, korporasyon ug imprastruktura, mas labaw lamang nalubong sa kumunoy sa kalisud ang katawhan samtang labawng nagkaadunahan ug nagkahakog ang mga burgesya-kumprador ug burukrata-kapitalista.



MGA PAGLAPAS SA TAWHANONG KATUNGOD				
(DISYEMBRE 1, 2024 - DISYEMBRE 1, 2025)				
239,357		665		
IHAP SA MGA BIKTIMA		IHAP SA MGA KASO		
40	312	34	306	21
PAGPATAY	PAGPANAKIT	PAGDAGIT	TORTYUR	PAGPAMUGOS
11	373	7,645	12,187	
PAKYAS NGA PAGPATAY	PAG-ARESTO UG DETENSYON	PUGOS NGAPAGPABAKWIT UG DISLOKASYON	PAGPANGHULGA, PAGPAMIG-OT, INTIMIDASYON	

Espesyal nga Report:
Dungan sa malukpanong korapsyon: Rehimeng US-Marcos, padayon ang pasistang pagpanumpo sa katawhan
<https://philippinerevolution.nu/>



Celine Manlimbasog

ang bag-ong tigpamaba sa **NDF-Eastern Visayas**. Ang pagtudlo kaniya kabahin sa pinalagsik nga gimbuhaton sa propaganda sa rehiyon. Subli usab nga gapagula ang Larab, rebolusyonaryong mantalaan sa rehiyon.



ang gidugang ni Marcos Jr sa sweldo sa MUP (*military and other uniformed personnel*) **para labawng paburuton ang mga sundalo ug pulis**, samtang gipaantus ang mga empleyado sa gubyrno, magtutudlo ug mamumuo sa ospital sa ubos nga sweldo, nadelatar nga mga benepisyo ug sobra-sobra nga pagtrabaho.

50 anyos na
ang **Liga ng Agham para sa Bayan** sa umalabot nga Disyembre 26.

₱24.81 MILYON
pondong gipagawas sa **SSS** nga pensyon niadtong 2024 nga nakapangalan sa patay na nga mga myembro niini.
₱13.19 milyon usab ang gigasto niini para sa 143,424 *tissue paper roll* o ₱92.00/roll.

400,000
sibilyan ang gibakwit gikan sa utlanan sa **Thailand** ug **Cambodia** tungod sa pag-ulbo sa gubat tali sa duha ka nasud. Lakip kanila ang 118 ka magtutudlong Pilipino.

20

dyip ug *van* nga iligal nga *gi-impound* sa LTO ang nabawi sa mga drayber niadtong Disyembre 10; ang maong mga sasakyanan gigamit sa protestang Baha sa Luneta 2.0 niadtong Nobyembre 30.



KASAMANG MADVI HIDMA

myembro sa Komite Sentral sa **Communist Party of India-Maoist** ug kumander sa PLGA nga gidakop ug tinuyong gipatay sa pasistang rehimeng Modi niadtong Nobyembre 18. Ilado siya sa malampusong mga taktikal nga opensiba sa PLGA.

Atubangan sa pagpanumpo sa rehimeng Marcos

Nakigbisog ang mga Pilipino para sa tawhanong katungod

Nakigduyog ang mga Pilipino sa pagdumdum sa ika-77 nga Internasyunal nga Adlaw sa Tawhanong Katungod niadtong Disyembre 10. Sa lain-laing bahin sa nasud, liboan ang nagmartsa aron panalipdan ang tawhanong katungod ug makmakon ang rehimeng Marcos sa walay puas nga paglapas niini sa katungod sa katawhan.

Gipasiugdahan sa Karapatan ug Bagong Alyansang Makabayan (Bayan) ang mga protesta sa Maynila ug 15 ka syudad ug prubinsya. Nagpadayag og suporta sa protesta ang International Coalition for Human Rights in the Philippines.

Sa Maynila, liboan ang misalmot sa panagtapok ug programa sa Liwasang Bonifacio ug sa martsa padulong sa Mendiola. Gawas sa mga organisasyong nakabase sa National Capital Region, miduyog sa protesta ang mga grupong gikan sa Southern Tagalog. Nagkahiusang panawagan nila: "Tapuson ang pasista, korap, ug paantus nga rehimeng US-Marcos Jr!"

Niadtong Mayo 2025, pormal nga gipatuman sa rehimeng Marcos ang National Action Plan for Unity, Peace, and Development 2025-2028. Nagsilbi kining gambalay sa gipagrabeng pulitikanhong pagpanumpo sa katawhan. Nag-una kining ginapatuman sa National Task Force-Elcac.

Sa rekord sa Karapatan, dili moubos sa 11 ka milyong Pilipino ang nahimong biktima sa paglapas sa tawhanong katungod sa mga pwersa sa estado ilalum sa rehimeng Marcos. Lakip kanila ang mga biktima sa ekstra-hudisyal nga pagpatay, pugos nga giwala, arbitrar-yong pag-aresto, pugos o pekeng pagpasurender, paturagas nga pagpamusil ug pagpamomba, pugos nga pagbalhin ug pagpanghulga, intemidasyon ug pagpanghadlok, lakip ang Red-tagging.

Nagpabiling piniriso ang dili moubos sa 696 ka bilanggong pulitikal, 163 giaresto ilalum ni Marcos. Sa mga bilanggong pulitikal, 136

ang babaye, 93 ang tigulang, ug 89 ang masakiton. Adu-na usay 12 ka konsultant ug istap sa National Democratic Front of the Philippines alang sa negosasyong pangkali-naw ang napriso.

Sa pagkahuman sa protesta sa Mendiola, gisunog sa mga grupo ang *effigy* nilang Marcos ug Sara Duterte nga gihulagway isip hari ug reyna sa pasismo ug korapsyon. Gipakita sa *effigy* nga adunay bitbit nga armalayt si Marcos ug Duterte samtang nakalingkod sa mga maleta nga simbolo sa korapsyon.

Susamang mga protesta ug aktibidad usab ang gilunsad sa Baguio City, Tabuk City sa Kalinga, Mountain Province, Laoag City sa Ilocos Norte, Tarlac, Nueva Ecija, Bulacan, Legazpi City sa Albay, Naga City sa Camarines Sur, Iloilo City, Kalibo City sa Aklan, Roxas City sa Capiz, Bacolod City, Cebu City, ug Davao City.

Pagpanalipud sa tawhanong katungod sa simbahan ug mga magbabalaod

Gikan pa sa panahon sa kanhing rehimeng Duterte, pinakamadugon ang rekord sa estado sa paglapas sa tawhanong katungod sa Mindanao. Labing grabe kini niadtong gipahamtang ang balaod militar gikan Mayo 2017 hangtud 2019.

Niadtong Disyembre 9-10, gilunsad sa Davao City ang Mindanao Human Rights Summit. Gisalmutan kini sa 242 ka delegado gikan sa simbahan, ingonman sa mga abuga-

do, tigpanalipud sa tawhanong katungod ug organisasyong masa sa Mindanao.

Sa ikaduhang adlaw sa aktibidad, gipahigayon ang asembleya ug paglunsad sa Pakighiusa sa Anawim-Mindanao (Panaw-Mindanao). Ang bag-ong natukod nga grupo naglaraw nga hatagag tingog ug hustisya ang mga biktima sa mga paglapas sa tawhanong katungod sa Mindanao.

Sa Kongreso, subling gilunsad ang Mambabatas para sa Karapatang Pantao o Makatao Coalition niadtong Disyembre 9. Tumong sa koalisyon nga iaslang ang mga balaod nga manalipud sa tawhanong katungod. Una kining gitukod sa mga magbabalaod, lakip ang Makabayan Bloc, niadtong 2018 aron babagan ang mga ekstra-hudisyal nga pagpatay sa kanhing rehimeng Duterte. Kasamtangan kining gipanguloan ni Rep. Leila de Lima. AB



Ika-tulong anibersaryo sa pagkamatay ni Ka Joma, gidumdum

Gidumdum sa pamilya, higala, mga kauban, partido ug organisasyon sa lain-laing bahin sa kalibutan ang ika-tulong anibersaryo sa pagkamatay ni Kasamang Jose Maria Sison niadtong Disyembre 16. Sa Pilipinas ug the Netherlands, naglunsad og mga aktibidad isip paghandum kang Ka Joma.

Sa the Netherlands, gipasalida ang pelikula-dokumentaryong *My Friend the Terrorist* niadtong Disyembre 13. Gipasiudahan ang aktibidad sa Jose Maria Sison Legacy Foundation, Friends of the Filipino People in Struggle ug lokal nga organisasyon niining Maya Solidarity.

Sa Pilipinas, gihalad kang Ka Joma sa usa ka sangay sa Partido Komunista ng Pilipinas sa Rizal ang gilunsad niining pagtuon sa Bata kang Kurso sa Partido niadtong Disyembre 16.

Sa Quezon City, giparangalan si Ka Joma sa mga balangay sa *Artista at Manunulat ng Sambayanan* sa gipasiugdahan niining raling pinakilab sa University of the Philippines-Diliman niadtong Disyembre 17. Gihimo kini atol sa Lantern Parade, ang tinuig nga parada sa mga parol sa kampus nga ginabisita sa liboang tumatambong.

Gawas dinhi, gihatagag duut usab sa rali ang umalabot nga ika-57 anibersaryo sa Partido sa Disyembre 26 ug ang panawagan sa katawhang Pilipino, ilabinsa sa mga kabatan-onan, nga suportahan ang gubat sa katawhan ug mosalmot sa Bagong Hukbong Bayan.

AB

MSP-NCR, naglunsad og asembliya

NAGTAPOK ANG KAPIN 20 ka myembro sa balangay sa Makabayang Samahang Pangkalusugan-National Capital Region (MSP-NCR) sa usa ka sikretong lugar niadtong Disyembre 6 aron ilunsad ang ilang rehiyonal nga asembliya. Mitambong dinhi ang mga mamumuo sa panglawas sa ospital, nars, duktor, *medical technologist*, dentista, ug mga estudyante sa medisina ug pagka-nars.

Ang asembliya giatol sa pagdumdum sa ika-47 nga anibersaryo sukad nga natukod ang MSP niadtong Disyembre 6, 1978.

Sa asembliya, gipalig-on sa MSP-NCR ang baruganan para sa demokratikong rebolusyon sa katawhan atubangan sa grabeng pag-antus sa katawhang Pilipino. Matud niini, mahinungdanong tigumon ang kusog sa sektor sa panglawas sa pakigbisog sa katawhan alang sa pagpaasdang sa rebolusyon.

Natibuok usab sa asembliya ang 5-puntong resolusyon alang sa pagpakusog sa pakigbisog niini. Gipagula ang resolusyon sa gimantalang espesyal nga isyu sa mantalaan sa MSP nga Ang Rebolusyonaryong Lunas.

Matud sa tsapter, mahinungdanong okasyon ang asembliya alang sa konsolidasyon sa gisakupan sa MSP. Naghatag-dalan kini aron makapaambit ang mga myembro sa rebolusyonaryong kasinatian sa pag-organisa ug kahimtang sa paghatag-serbisyo sa MSP nga tumugon sa panawagang moadto sa kabanikanhan. Dugang niini, mahinungdanong lakang usab ang asembliya sa pag-andam sa dugang pang konsolidasyon sa MSP sa nasudnong langkub.

Mga mag-uuma ug lumad, ginapalayas sa kaugalingong yuta

WALAY PUAS ANG pagpangilog sa mga langyawng kumpanya ug dagkung burgesyang kumprador sa kinaiyanhong bahandi ug yutang kabilin sa mga lumad ug mag-uuma sa nasud. Gamit ang pulis, militar ug ang mga korte, giyatakan niini ang katungod sa mga mag-uuma sa yuta, ginasumpo ang ilang pakigbisog ug ginagamit ang balaod aron palayason sila sa kaugalingon nilang yuta.

Sa Sityo Marihangin, Barangay Bugsuk, Balabac, Palawan, gिकासuhan og “squatting” o iligal nga pagpuyo sa siyam ka mangingilog og yuta ang 282 ka residenteng lumad sa sityo. Lakip sa gिकासuhan mga patay na ug mga bata. Niadtong Disyembre 17, misulong sa sityo ang sugo sa korte uban ang mga armadong pulis aron magtunol og TRO o *temporary restraining order* batok sa mga residente.

Matud sa mando, bawal babagan ang pagsulod sa sityo sa mga mangingilog og yuta sulod sa 20 ka adlaw. Matud sa mga residente, tin-aw nga adunay kalabutan ang maong kaso sa plano sa San Miguel Corporation (SMC) nga ilugon ang ilang yutang kabilin. Pipila ka tuig nang ginapugos sa Bricktree Properties, subsidyaryo sa SMC, nga angkunon ang yuta aron tukuran og 25,000 ektaryang imprastrakturang pangturismo alang sa labing adunahan sa Balabac.

Sa Dupax del Norte, Nueva Vizcaya, duha ka hugna nang gimandoan sa korte ang pagbungkag sa barikada sa mga residente batok sa Woggle Corporation. Niadtong Disyembre 10, malampusong napugngan sa mga residente ug tawong simbahan ang sulayang pagbungkag. Subling miatake ang mga pulis niadtong Disyembre 12 aron bungkagon ang barikada sa mga residente sa Upper Tacbao, Barangay Bitnong. Balos kini sa kumpanya human makaplagang sunog ang *excavator* niini niadtong adlaw.

Kaabag ang PNP Dupax Del Norte, gihadlok, gipig-ot, ug gibastos nila ang mga nagbarikada ug giguba ang ilang mga gamit. Duha ka babayeng residente ang giharang sa mga ginsakpan niini ug pugos nga gipahubo. Gitiunan usab og pusil sa mga pulis ang mga residente dihang giduso nila ang ilang mga katungod. Gikawat usab ang ilang mga selpon ug ID dihang nagsulay ang mga residente nga idokumento ang pagpanghasi kanila sa mga maton.

Kalibutanong adlaw sa mga migranteng mamumuo, gidumdum sa Pilipinas ug sa ubang nasud

GIDUMDUM SA LAIN-LAINING tsapter sa Migrante ang kalibutanong adlaw sa mga migranteng mamumuo niadtong Disyembre 18. Gideklara usab nila kini isip "Zero Remittance Day batok sa korapsyon," usa ka adlaw nga dungan-dungan nga dili magpadala og kwarta ang mga migrante sa Pilipinas. Porma kini sa protesta sa mga migranteng mamumuo aron irehistro ang ilang pagkundera sa malukpanong korapsyon ug pagpangawat sa tanang nalambigit.

Misalmot sa kampanya ang mga balangay sa Migrante sa Thailand, Hong Kong, Japan, Canada, France, Italy, Australia, South Korea, Germany, Middle East ug USA.

Naglunsad usab og protesta ang pipila ka balangay sa Migrante aron kundenahon ang mga pagpangabuso ug diskriminasyon nga ilang gakasinati isip migranteng mamumuo.

Sa New Zealand, gipanawagan sa Migrante-Aotearoa ang pagtapos sa sistema sa paghikot ng work visa sa migrante sa employer.

Sa US, nagprotesta ang Tanggol Migrante Movement (TMM) sa konsulado sa Pilipinas sa Chicago, California ug Washington aron ipanawagan ang paglingkawas sa mga Pilipinong imigrante nga gidetine sa Immigration and Customs Enforcement (ICE). Gianunsyo usab ang pagtukod sa Families of Filipinos in Detention, organisasyon sa mga pamilya, higala ug sa mga kanhing nadetine sa ICE.

Sa Pilipinas, nagprotesta sa Mendiola ang mga myembro sa Migrante Philippines gikan sa mga balangay niini sa lain-laing probinsya. Misalmot sa protesta ang Concerned Seafarers of the Philippines, Samahan ng mga DH sa Gitnang Silangan, ug Kilusang Mayo Uno.

Brutalidad sa militar ug pulis sa Masbate ug Occidental Mindoro

SA MASBATE, nadakpan, gitortyur ayha gipatay sa 2nd IB ang usa ka Pulang manggugubat sa Bagong Hukbong Bayan (BHB)-Masbate niadtong Disyembre 13. Ang manggugubat nasamdan sa tiil ug nadakpan human sa usa ka panagsangka sa Barangay Pitogo, Cataingan niadtong adlaw. Gipailalum siya sa brutal nga pisikal nga tortyur tungod sa pagkamatay sa duha ka sundalo sa 2nd IB.

Samtang niadtong Disyembre 9, giaresto sa mga pulis sa kasong pagpatay ug pasangil nga taas nga upisyal sa BHB si Juanito Bultron. Siya usa ka residente sa Barangay Teresita, Cataingan nga adunay kabilingan sa panghunahuna. Ginapagawas sa pulis nga nadakpan siya sa Barangay Malibas, Palanas.

Sa Occidental Mindoro, gidagit ug gitortyur sa 76th IB si Dolores Mariano Solangon, 47-anyos nga babayeng Mangyan-Iraya, sa Abra de Ilog, Occidental Mindoro niadtong Disyembre 2, ala-1:30 sa hapon. Gigapos siya sa usa ka kahoy ug gipailalum sa interrogasyon hangtud alas-4:00 sa hapon.

Gidala siya sa bukirong erya ug subling gitortyur hangtud alas-9:00 sa gabii. Gipakalot usab siya sa kaugalingong lubnganan ug gihulgang patyon kung moikyas. Nahitabo ang pagdagit ug pagtortyur kang Solangon human ang usa ka engkwentro sa 76th IB sa BHB sa Sityo Balite, Barangay Lumangbayan sa Abra de Ilog niadtong Nobyembre 26."

Aregluhan sa pondong "pork" sa badyet 2026, gipinal sa bicam

AREGLUHAN SA BAHINAY sa *pork barrel* sa badyet 2026 ang nasaksihan sa katawhan sa gipahigayong *bicameral conference committee (bicam)* sa Senado ug kongreso. Bisan og naka-livestream, wala gitago sa mga magbabalaod ang ilang panagbangi sa bisan unsang porma sa *pork barrel* ug pila ang mabilin sa badyet. Gipinal sa *bicam* ang puno sa *pork barrel* nga badyet niadtong Disyembre 18.

Kunuhay gikibhangan sa Senado ang badyet sa Department of Public Works and Highways og ₱45 bilyon tungod sa *overpricing* apan gibalik sa *bicam* ang kapin katunga sa pondo. Sa ingon, nagpabilin sa badyet ang bulto sa pondong "allocable" ug "non-allocable" kung asa nagakuha ang presidente, mga kongresista ug senador sa tagsa-tagsa nilang kikkak.

Lain pang giareglo sa *bicam* ang pagdugang og pondo alang sa Medical Assistance for Indigent and Financially Incapacitated Patients, *pork barrel* sa mga kongresista sa porma sa "serbispong panglawas." Gipatas-an pa sa *bicam* ang alokasyon gikan sa orihinal nga ₱49.2 bilyon ngadto sa ₱51.64 bilyon, pondong angay untang idugang sa badyet sa mga pangpublikong ospital.

Giareglo usab sa *bicam* ang "LGU pork" o Local Government Support Fund nga halos gidoble sa Senado gikan ₱20.2 bilyon ngadto sa ₱38.1 biiyon. Gikibhangan sa Senado ang pondo alang sa mga benepisyo ug bonus sa mga empleyado aron paburuton ang pondong ayuda nga gunit sa mga lokal nga upisyal.

Kini nga mga alokasyong dugang sa nauna nang nauyunang pondong gunit sa mga magbabalaod sa porma sa ayuda. Gipatas-an pa sa *bicam* ang ayudang Assistance to Individuals in Crisis Situations gikan sa orihinal nga ₱27 bilyon ngadto sa ₱63 bilyon.

Napabilin usab ang *pork barrel* ni Marcos nga ₱243.4 bilyon alang sa *unprogrammed appropriation* (nga nabantog nga gigamit sa puno sa anomalyang *flood control project*) ug ₱10.77 bilyong *confidential and intelligence fund*. Wala usab natandog ang ₱8-bilyong *pork barrel* sa pasistang ahensyang NTF-Elcac.

Kadaut ug kaguliyang sa imperyalistang gubat, nasinati sa mga mangingisda ug mag-uuma

Sa mga mangingisda ug mag-uuma nga nanimuyo duul sa mga base militar ug gilunsaran sa mga *war games* sa US, dili la-yong posibilidad ang imperyalistang gubat. Karon pa lang, nasinati na nila ang kaguliyang ug kadaut nga bunga niini sa ilang panginabuhian ug komunidad.

Lakip kini sa daghang nadokumento sa 35-katawong delegasyon gikan sa US nga milibot sa mga komunidad duul sa mga base militar o EDCA site niadtong Nobyembre. Sulod sa duha ka semana, magkabalag nilang gituyok ang Cagayan Valley, Ilocos, Central Luzon, Cagayan de Oro, Marawi City ug Cebu City. Miadto usab sila sa mga lugar kung asa sagad ginalunsad ang malangkubong *war games* sama sa Balikatan.

Giduaw sa delegasyon ang Pilipinas taliwala sa gakahitabong militarismo sa rehimeng Trump sa Asia. Sa milabayng duha ka tuig lang, naghatag ang US og mga *long-range missile* sa Pilipinas, nag-anunsyo sa pagtukod og mga pabrika sa bala ug *drone*, ug nag-abli og daghan pang lokasyon aron mahimong bodega, *outpost* ug dugguanan sa mga tropa ug barkong Amerikano. Naglunsad kini og walay puas nga mga *war games*, naghimo og mga *live-fire exercises* sa kadagatan ug simuladong mga kombatan opensiba ug depensiba.

Sa mga komunidad nga giadtuan sa delegasyon, sayod ang mga residente nga ang mga base militar ug *war games* nagbutang kanila ug sa Pilipinas sa sentro sa imperyalistang gubat tali sa US ug China. Giangkon mismo sa mga upisyal sa US nga ang mga EDCA site direktang nakasumpay sa “depensa sa US sa Taiwan.” Giduso sa maong mga upisyal nga “ibaligya” sa US ang mga EDCA site sa Taiwan isip “non-weaponry support service” sa nasud.

Tinuod nga kadaut sa simuladong gubat

“Abi namog gubat na,” ang sa-

gad masulti sa mga residente nga nakahinabi sa delegasyon sa mga baryo sa Cagayan Valley. Daghan kanila ang natugaw na lang sa kalit pagdagsang sa langyawng tropa, dagkung sakyanan ug alingogngog nga eroplano sa ilang lugar matag adunay *war games* ang US.

“Walay pahimangno. Walay nagsulti kung unsay mahitabo, o kung unsa ka dugay,” say-say sa nakahinabi sa delegasyon. Kalit nga natanggong ang ilang trabaho aron hatagag dalan ang mga “simulasyon” sa pag-atake sa tropa gikan sa kadagatan. Miabot ang mga maniobrang pangkombatan sa tropa sa mga kalsada, umahan, pangisdaanan ug sa tugkaran.

Daw piniriso ang mga residente sa tagsa-tagsa nilang mga panimalay samtang “naghaguros” ang “simuladong gubat” gawas sa ilang mga pultahan. Walay ayuda para makasugakot sila sa inadlaw-adlaw. Walay kumpensasyon sa mga adlaw nga dili sila makatrabaho. Human sa “gubat,” nagbilin pa ang mga tropa og basurang basyo sa bala ug uban pang amunisyon sa mga baybay, kung asa nagadula ang mga bata.

Peligro sa kadagatan

Direktang gibutang sa presensya sa US ug mga *war games* niini ang mga mangingisdang Pilipino sa peligro. Niining Disyembre lamang, naglunsad ang US og sunson nga *maritime cooperative activity* (MCA) isip “power projection” sa gilugang mga isla ug pormasyon sa South



China Sea. Ang una (Disyembre 9-10) gilunsad sa kasadpan sa Zambales, duul sa tradisyunal nga pangisdaanan sa Scarborough Shoal. Nagpalupad dinhi ang US og lain-lain klase sa *jetfighter* ug nagparada og higanteng *aircraft carrier* nga USS Rafael Peralta.

Giila sa China ang aktibidad isip probokasyon nga nagpataas sa tensyon sa kadagatan. Nagresulta kini sa panagbingkil tali sa mga pwersang Chinese ug Pilipino niadtong Disyembre 11-12, kung asa nalambigit ang pipila ka mangingisdang Pilipino.

Gigamit sa US ang insidente aron hatagag katarungan ang paspas nga paglunsad sa kasunod nga MCA (Disyembre 15-16). Gipadala niini ang USS Robert Smalls, usa ka *guided-missile cruiser*, aron paypayan ang miulbong banggaay ug pagawasong sila “tigluwas” sa Pilipinas. Ang serye sa maong mga insidente kabahin sa mas lapad nga padron sa pagpanulsol sa US, balos sa China ug pagkadaut sa panginabuhian ug kaayuhan sa mga mangingisdang Pilipino.

Dili mabuntog ang rebolusyonaryong kalihukan sa India

Walay katugbang ang pasistang atake sa Operation Kagar sa reaksyunaryong estado sa India batok sa masa ug rebolusyonaryong kalihukang Indian sa milabayng halos duha ka tuig. Atubangan niini, nanglimbasog ang Communist Party of India (Maoist), ang People's Liberation Guerrilla Army (PLGA), ug tibuok rebolusyonaryong kalihukan sa India nga pakyason ang deklaradong laraw sa Kagar nga tapuson ug pukanon ang pagsukol sa katawhan sa Marso 2026.

Sukad nga gipatuman niadtong Enero 2024 ang Operation Kagar, maisugon kining gisuklan sa PLGA. Taliwala sa daku kaayong pwersang pangdumog ug pangliyok sa rehimeng Modi, pagsulpot sa mga kampo militar ug kampanyang likidasyon sa liderato sa Partido, nakalunsad og mga armadong aksyon ang gerilyang hukbo.

Sa milabayng tuig, mikabat sa 116 ang napatay ug 208 ang nasamdan sa pwersa sa pulis ug sundalo sa mga armadong aksyon sa PLGA. Gitarget usab niini ang lunod-patay nga impormer sa pulis ug militar ug mga panatikong lider sa Bharatiya Janata Party, nagharing partido sa India. Nag-unang nagagamit og mga eksplusibo ang hukbo sa mga operasyon niini. Ug sa pipila ka higayon, nagagamit ang PLGA og mga lumadnong armas sama sa mga lit-ag nga suyak.

Bisan pa man, matinud-anong gihikyad sa CPI (Maoist) nga nakasinati kini og grabeng pagkapildi sa milabayng tuig. Matud niini, bunga ang mga kapildihan sa internal nga mga kahuyangan, kapakyasang ipatuman ang mga plano sa Komite Sentral ug sa gipagrabeng atake sa estado.


Gikan Disyembre 2024 hangtud Nobyembre niining tuiga, mikabat sa 320 ka mga rebolusyonaryo ang namartir diin 117 mga babaye. Dili moubos sa 237 kanila myembro sa Partido. Walo anaa sa ang-ang Komite Sentral, lakip ang kinatibukang kalihim sa Partido nga si Kasamang Basavaraju, 15 ang ang-ang komite sa estado, 25 ang ang-ang

distrito, ug 73 ang ang-ang komite sa erya. Adunay 13 gikan sa PLGA ug 33 ka mga kadre ug aktibista sa organisasyong masa.

Aron molagsik balik, nanawagan ang CPI (Maoist) nga pakusgon ang pagsukol sa Operation Kagar sa tibuok nasud. Giduso sa Partido nga puntingon ug tul-iron ang nahimong mga kasaypanan sa milabayng 22 ka bulan aron mapugngan ang labaw pang mga kapildihan. Angayan usab kunong tun-an ug tukion ang obhetibong kahimtang ug suhetibong pwersa sa matag erya aron subling palagsikon ang Partido, makonsolidada ang PLGA ug ang mga organisasyong masa.

Isa sa mga naunang natukoy sa Partido nga kasaypanan niini, ilabina sa gubat sa katawhan, mao ang pagpasigpit sa kaugalingon pinaagi sa pagpagamay sa eryang nalihukan. Matud niini, kinahanglang molihok sa mas lapad nga langkub ang hukbo ug dili magpabiling sentralisado. Partikular nga pananglitan niini ang kapakyasang magbalhin og tropa sa PLGA gikan sa rehiyong Dandakaranya, nga episentro sa Operation Kagar, ngadto sa ubang rehiyon.

Gawas dinhi, gihikyad usab sa Partido ang panginahanglang ibutyag, isalikway ug batukan ang mga traydor sa rebolusyon. Pinakabantog sa maong mga traydor silang Sonu (Mallojula Venugopal Rao), kanhing myembro sa Kawanihan sa



Pulitika sa CPI (Maoist), ug Satish (Takkallapalli Vasudeva Rao) nga aktibo na karong nagpagamit sa rehimeng Modi. Misurender sila niadtong Oktubre, ug nag-aghat sa uban pa niadtong Nobyembre. Mikabat sa 299 ka indibidwal ang nadala sa pundok ug nagsurender sa dili moubos sa 277 ka armas sa PLGA ug Partido.

"Niining panahona, tahas natong langkaton ang kahadlok ug kahigwaos sa atong han-ay, magpakita sa kaisog ug pakusgon ang kumpyansa sa atong Partido," matud sa CPI (Maoist). Dugang niini, sa grabeng krisis sa nasud, labawng nagkatin-aw karon ang panginahanglan nga pangulohan sa Partido ang kinatibukang makihutong nga pakigbisog sa masang Indian aron ibagsak ang paghari sa mga imperyalista, dagkung kumprador, ug mga agalong yutaan.

Pagpakita sa determinasyong moabante ang pagdiriwang sa rebolusyonaryong kalihukan sa India sa ika-25 anibersaryo sa PLGA niadtong Disyembre 2. Sa Semana sa Pagsaulog gikan Disyembre 2-8, gilunsad sa lasang, kapatagan, ug sentrong urban, ang mga tigum sa grupo ug gagmayng panagtapok. Nagsab-it ug nag-apud-apud ang mga rebolusyonaryo og mga poster ug polyeto aron ipanawagan ang pagpakusog ug pagsalmot sa PLGA. Gilunsad kini nga may hugot nga pag-amping ug pagprayoridad sa seguridad tungod sa gipagrabeng atake sa estado.

AB